

Obadiah / עבדיה - According to Dead Sea Scrolls Manuscripts Combined

Chapter 1

¹ חזון עובדיה כה אמר אדני יהוה לאדום שמועה שמענו מאת יהוה וציר בגוים שלח קומו ונקומה עליה למלחמה:

² הנה קטן נתתיך בגוים בזוי אתה מאד:

³ זדון לבך השיאך שכני בחגוי סלע מרום שבתו אמר בלבו מי יורדני ארץ:

⁴ אם תגביה כנשר ואם בין כוכבים **תשים**¹ קנך משם אורידך נאם יהוה:

⁵ אם גנבים באו לך אם שודדי לילה איך נדמיתה הלוא יגנבו דים אם בצרים באו לך הלוא ישאירו עללות:

⁶ איך נחפשו עשו נבעו מצפניו:

⁷ עד הגבול שלחוך כל אנשי בריתך השיאוך יכלו לך אנשי שלמך לחמך ישימו מזור תחתיך אין תבונה בו:

⁸ הלוא ביום ההוא נאם יהוה והאבדתי חכמים מאדום ותבונה מהר עשו:

⁹ וחתו גבוריך תימן למען יכרת איש מהר עשו מקטל:

¹⁰ מחמס אחיך **יעקוב**² תכסך בושה ונכרת לעולם:

¹ 4QXII⁹(corr), LXX: *you set*. 4QXII⁹(*), MurXII and Masoretic read **שים** which alters the text from *you set your nest*, to *your nest is set*. There is very little change of meaning to the text.

² 4QXII⁹: *Ya'qowb* (plene spelling). MurXII and Masoretic have the defective spelling **יעקב**.

- 11 ביום עמדך מנגד **ביום**³ שבות זרים חילו ונכרים באו שערו ועל ירושלם ידו גורל גם אתה כאחד מהם:
- 12 ואל תרא ביום אחיך ביום נכרו ואל תשמח לבני יהודה ביום אבדם ואל תגדל פיך ביום צרה:
- 13 אל תבוא בשער עמי ביום אידם אל תרא גם אתה ברעתו ביום אידו ואל תשלחנה בחילו ביום אידו:
- 14 ואל תעמד על הפרק להכרית את פליטיו ואל תסגר שרידיו ביום צרה:
- 15 כי קרוב יום יהוה על כל הגוים כאשר עשית יעשה לך **גמלכה**⁴ **ישוב**⁵ בראשך:
- 16 כי כאשר שתיתם על הר קדשי ישתו כל הגוים תמיד ושתו ולעו והיו כלוא היו:
- 17 ובהר ציון תהיה פליטה והיה קדש וירשו בית יעקב את מורישיהם:
- 18 והיה בית יעקב אש ובית יוסף להבה ובית עשו לקש ודלקו בהם ואכלום ולא יהיה שריד לבית עשו כי יהוה דבר:
- 19 וירשו הנגב את הר עשו והשפלה את פלשתים וירשו את שדה אפרים ואת שדה שמרון ובנימן את הגלעד:
- 20 וגלת החל הזה לבני ישראל אשר כנענים עד צרפת וגלת ירושלם אשר בספרד ירשו את ערי הנגב:
- 21 ועלו משעים בהר ציון לשפט את הר עשו והיתה ליהוה המלוכה:

³ MurXII, Mas: *in the day*. 4QXII⁹ reads **ביו**, which is a scribal mistake.

⁴ 4QXII⁹: *your deed* (plene spelling). MurXII and Masoretic read the defective spelling **גמלך**.

⁵ MurXII, Mas, LXX: *it shall return*. 4QXII⁹ reads **שובו** meaning *they shall return*. Change is from singular to plural.